

愚山詩集

愚山詩集

施愚山先生學餘詩集卷之六

五言古

書感

上哲能不憂中人尚知足偃鼠飲長河快意在滿腹神
龍失所依進退成抵觸天道亦何常平地多翻覆積毀
詎有階守正豈蒙福吉凶吾曷從握粟未敢卜

清源行

視學秩滿將歸道經臨清諸生携具相餉却再
四不可嗟乎施子服官不得盡其道循職而已
諸生復何德予哉作清源行

駕言及星爛輟軌已夕陽逝將返初服戒僕裹餼糧濟

濟二三子依依登我堂長跪出篇什携贈兼酒漿苦辭
不忍去佇立久徬徨改顏爲斟酌僕馬各充腸平生薄
口腹此意獨難忘春風拂前浦芳草生清光含情無可
極遺響託滄浪

北海有一士爲孫子仲孺作

寶侗址亭相國子

北海有一士高步覽八區簪纓推世胄章句薄腐儒嗜
古賞自延探奇目無虛藩溷盡筆札坐臥皆詩書非徒
富述作實耻經術疎趨庭過薊北結友連東吳平生非
任俠意氣雄千夫男兒貴不朽浮名何足圖盛年振高
轡策驥騁修塗

留別徐符嶠臬使

燕臺射策時與子同陋巷晨昏屢叩門索酒竭鄰釀聯
袂捷南宮時艱資侔儻王帥方入粵特簡俾司餉三年
冒矢石側身飽炎瘴關地始到官瘡痍非一狀奉使予
南征入覲予北向上下各孤舟風帆不相傍到今臬東
藩把臂喜然同志絕然疑感舊叙少壯法嚴多大獄
誰肯問无妄寬和干國憲刻急叢物謗慘澹慎平反讞
成懷餘愴有時厭丹筆舉杯眺青嶂聞我歸故園惜別
獨惆悵野性習沙鷗五湖將浩蕩感茲意拳拳含情辭
祖帳

發濟南示諸生

曰歸不暇寐中夜趣晨裝清泉帶城郭依依垂綠楊羣

公列祖帳臨發難盡觴繾綣復多士追送踰川梁下馬
與之揖羅拜淚沾裳齊魯古大國東海風泱泱起衰吾
未逮知已胡不忘逝矣千里心悠悠九迴腸雖下董生
帷誰升孔氏堂黽勉有遺恨努力永相望

寧陽行

客行倦修塗流民填路隅吞聲但長跪淚下沾衣襦停
車傾我篋人給慚錙銖去此未及遠接踵相號呼誰能
盡沾灑緩死爭須臾去年民爲魚今年麥又枯豈無蠲
租令不得收溝渠蕭條日將夕酸鼻空踟躕

過洪林值湯衣白邀宿

東峰餘返景疲馬嘶秋原黃花寒婉孌流水莫潺湲所

親值野老邀我歸南村喬木秀墟里零露繁草根笑歌
不覺遠明月方在門苦陳去年亂窮巷無雞豚園蔬雜
筐果顛倒引匏尊夜深臥草閣閉戶溪聲喧白雲入檐
隙浩然清心魂

秋夕邀吉水宗人偉長宛溪汎月兼送其遊潯陽

同大美阮
懷耦長

輕雲歸遠岫涼月見江樹棹歌可遊娛心賞未遲暮亭
亭謝公樓皎皎出城頭潛鱗粲可數微露溥芳洲水流
宵不歇客子行當發盆浦潮有無廬峰興超越歸塗近
鄉國羈緒悵離別言攀九疊屏儻憶雙溪月
避風入二條港

愚山先生詩集 卷六
解維燕子磯白浪阻征路橫江紆桂楫曲港截瓜步一
水蓼花洲夾岸垂楊樹田家開野店籬菊含秋露遠見
棲霞山青青若回顧不有石尤風那盡江村趣

妙高臺夜坐懷无可

卽子瞻佛
印賦詩處

日落水烟起茫茫連岼白褰裳陟高臺涼月皎秋夕古
人不我待露氣霑瑤席忽憶龍眠叟遠引就禪寂桂嶺
舊擔簦匡廬復飛錫遊咏與之俱屢折登山屐勸我學
無生危言同振溺心跡未能併出處尚狼藉解帶思同
遊天末久離析人生無老少皆爲天地客東望海門深
南睇江雲碧巖壑畱清暉皓歌傷往昔

題王阮亭漁洋山人集

有客卧招堤聞鐘百慮止時見楚江月遙從烟際起橘
柚垂虛簷清光生石几手把瑤華音靜念同懷子綺麗
復清泠濡翰信云美心目散山川衣裳被蘭芷羈人易
感觸三歎不能已寂寞將移情茫茫聞海水興賦爲取

登文選樓

廣陵精忠寺後
有昭明太子像

遊目憇精廬陟閣復清迴綺疏鳥雀喧層軒松檜冷白
雲緬逶迤隔江矚峰影拈徂薄黃屋篇章性所秉歆賞
集羣彥朝讌達夕永創獲矜校讎散籍歸匠郢梁社久
丘墟隋宮餘舊井廢興更代謝丹樓復華整斯人旣已
邈望古還引領橫流賤毫素蘭茝雜萍梗眇眇千春懷
淚下如脩綆

吳母苦節詩

歙人胡氏早寡撫遺腹子延支終其身

君遺妾有身妾思君同穴夙昔嫁君衣拭淚盡成血別
鵠一何早哺雛一何好萊彩曜中庭妾身自綦縞喔喔
霜雞啼札札鳴機絲機絲有斷續素心無改移

歲暮送陳伯璣之武林

先是期偕往不果

停楫待同舟送君成獨發惆悵紛難陳佇立生白髮養
疴歲序殫客愁無斷絕北風吹孤篷安知吳與越江頭
楓樹寒雙鳥啼不歇中宵吾有夢先向西泠月

平山堂

寒色靜四野平岡走孤獸振策肆重遊蕭條改結構荒

榭俯宿莽頽垣繚虛囿抗軌思昔賢遊讌賁巖岫悠悠
六百年遺徽邈難邁殘荷尚餘葢丹楓錯成繡喪亂悲
山川戎馬此馳驟舉目睇京峴巖飈暗清晝懿此崖際
泉清泠聊可漱

董仲舒祠

攘攘五都市南北交驅馳貴賤各有營崩迫無停時我
過董子祠中心悵有違相傳此舊宅精靈儼在茲斷碣
蝕蒼蘚荒几走伊威蘋蘩誰復薦清風吹我衣漢初尚
文籍大道久迷離夫子挈墜緒卓矣王者師如何末世
士罄折爭刀錐威鳳翔九仞腐鼠安足希

曉望燕子磯

挂席奔流回眺滄洲靜渚烟暖未分巖雪殘逾瑩峻
嶒松色寒窈窕嵐光靚延目辨蒼茫木末露樵徑亭刹
何參差丹青遮掩映不見六朝僧遠聞一聲磬

舟中望采石

孤嶼起中流截業連江岼霜巖碧松白樓迴朱霞爛巨
石陵天門崖字久漫漶咏史想遺音然犀懷壯觀潮汐
自往來人物幾凋換颺急吹豚魚天陰鳴水鸛英雄此
戰爭回首一悲嘆

早春三天洞至仙人巖

寒巖歛衆妙惠風蕩疎木洞穴無人居玲瓏闢華屋春
陰香乳流谷溫瑤草綠出戶見前峰重雲無斷續乘興

復杖藜行歌散煩促古樹含丹葩餘雪長靈瀑僧扉鑿
陽崖茶臼入深竹采真客安往悵望空山曲

宛溪春水曲

夜宿水聲中朝汎山烟裏洲沉沙尾截雲疊魚鱗起春
風不可贈美人望江汜愁心與白蘋搖蕩幾千里

微雨至慈靜寺

同陶夢剡

積雨知不晴薄陰亦可喜舟浮葭莢沒櫂撥鴛鴦起捲
幔受輕風憂舫散甘醴青峰雲霧交明滅同海市不惜
濕芒鞋遠踏空濛裏南屏枕寺閣井泉湛階啟古塔挂
新蘿丹青爛成綺窅冥嘯嶺猿羃歷迷山鬼回艇睇前
峰惟見碧湖水

湖上荅陸麗京

翡翠集蘭苕鳳凰棲崇岡光輝各燦爛羽翼難頡頏西
陵富才彥指匠挺珪璋閎闊豈不貴蓬室潛幽光矯志
厲金石濡翰辭篇章譬彼陽春月百卉敷芬芳窮岫逢
赤松跪受不死方蘭櫂激清流爲樂殊未央永言申宿
好德音不可忘

贈柴虎臣

與君始投分把臂遊長安列坐盈觴酒吐論中情殫清
秋朔風厲良會忘夜闌篇翰曜連璧客子爲加餐山川
一離析春華成歲寒孤鶴潔羽翼歛啄良獨難竭來卧
城隅咫尺限重關浮雲隨迅飈萬里何時閒相望懷慊

慊撫枕一長嘆

贈毛馳黃

所著有韻
學辨諸書

總轡息江汜采蘭臨芳洲佳人惠良訊願言同行遊矢
口發丹葩德音申綢繆餘波沿六季高唱溯商周律呂
既精析風騷資討求綺麗傷人心忼慷淚雙流申椒雜
衆草道遠無蹇修不如呼所歡飲酒登高樓

留別越中諸子

時徐伯調祁止祥毛大可張南士
姜桐音沈康成羅弘載相繼至

我昔遊會稽息駕瑯琊山賓從共翱翔長嘯浮雲間興
文歡愛簡臨水駢芳筵朱李泛南皮清夜會西園良宴
死昨日馳暉凋壯顏涉江枉相存羣彥何翩翩尊酒歡
未畢良時苦不閑聊和絃歌曲結臆不能宣子爲潛波

鱗我作衝飈翰曷哉璠璣美揚芬垂簡編

荅虞景明

嘉會城西隅皎皎陽春日手持郢人唱膠結意難畢宛
轉含悲辛清響逾琴瑟申章復永嘆知音慕儔匹豈無
桃李華眷此蘭蕙質奮志揚芬芳結佩采秋實誰言傾
城姿終老在蓬室

上天竺雙檜峰

昔聞九里松夾路響清瀨今尋雙檜峰壁立衆山外危
磴壘丹梯陰霞成紫蓋平臨江海寬俯看丘壑碎人生
若飛籜倏與流飈會濡首塵坱間寧識滄洲大乘風叩
闥闔浮雲接衣帶

答魏山人

養疴倦辭賦倚醉耽孤眠悠然遠山雲墮我北窗前攬
之不可得滿屋生蒼烟知子薄雕蟲清嘯懷列仙時傾
若下酒不問東臯田誰當理輕策相從巖壑間

暮投六一泉寺

石泉近湖曲皚皚自清泠照見古人心高風邁箕穎振
策陟山椒朱霞散西嶺日暮烟乍生鳥歸林逾靜逍遙
憇石梁杳冥動漁艇夜久衆星光猶明數峰影

答瞻伯

芙蓉生綠波乃臨大道側芳華雖憔悴濯濯好顏色夙
昔贈我言綢繆在京國荏苒逾六春流光一太息新聲